

Headlines

- जम्मू-कश्मीर विधानसभा दा बजट इजलास कल्लै थमां शुरू होआ'रदा ऐ। एहदे बवस्थित ढंगै सिर आयोजन लेई सब्भै तैयारियां करी लैती गेदिआं न।
- बजट इजलास कोला इक दिन पैहले, मुखमंत्री ओमर अब्दुल्ला होरें अज्ज अपने भ्याल दलें दी इक सांझी बैठक लाइयै विधानसभा दे बवस्थित ढंगै सिर कम्मकाज बारै चर्चा कीती।
- गृह मंत्री अमित शाह होरें भारत गी नशा-मुक्त बनाने लेई नशीले पदार्थ दे तस्करें खलाफ कार्रवाईयां तेज करने दे अपने धेइये गी फही पक्का कीता ऐ।
- इक नमें शोध दे मताबक पिच्छले दहाके दरान भारत च गरीबी च महत्वपूर्ण कमी आई ऐ।

<><><><><><>

Budget Session Arrangements

विधानसभा दा बजट इजलास कल्लै थमां शुरू होआ'रदा ऐ। उपराज्यपाल मनोज सिन्हा होर कल बडलै 10 बजे विधानसभा गी संबोधत करगंन। ओह सारे मिंबरें दी मजूदगी च औपचारिक तौरा पर सदन गी संबोधत करगंन। सत्र गी सुचारू ढंगै सिर चलाने लेई सारे इंतजामें जियां सुरक्षा ते होर दुए लोइचदे बंदोबस्त कीते गेदे न। सत्र दरान बजट सरबन्धी ते प्रशासन मतलक केई सारे महत्वै आले मामलें पर ध्यान केन्द्रित करदे होई खिते दी आर्थिक गतिविधिं गी प्रमुख तौर पर तवज्जो दिती जाग।

<><><><><><>

Party-Meeting

जम्मू-कश्मीर विधानसभा दा बजट इजलास कल्लै थमां शुरू होने कोला पैहले अज्ज मुखमंत्री उमर अब्दुल्ला होरें सभा दी कारवाइयें गी बवस्थित ढंगै नै चलाना यकीनी बनाने लेई भ्याल पार्टियें दी इक सांझी बैठक दी अध्यक्षता कीती। बैठक च कांग्रेस पार्टी दे लीडर गुलाम अहमद मीर ते सी.पी.आई (एम) दे विधायक एम.वाई तारीगामी होर शामिल होए। एहदे शा पैहले बजट इजलास दे शुरू होने थमां पैहले नेशनल कांफ्रेंस नै अज्ज इक महत्वै आली बैठक सद्दी। एह बैठक दपैही 2 बजे मुखमंत्री हुंदे अधिकारिक आवास स्थान पर लग्गी। इस बैठक दी अध्यक्षता मुखमंत्री उमर अब्दुल्ला होरें कीती। इस दरान बजट सने होर केई सारे महत्वै आले मामलें पर चर्चा कीती गई। तोआई कांग्रेस पार्टी दी बी अज्ज दपैही 2 बजे जम्मू आले पार्टी सदर दफ्तर च बैठक लग्गी। पार्टी नेता निजामुद्दीन भट्ट होरें पार्टी दे सारे विधायकें गी इस बैठक च शामिल हाने लेई साद्दा दिते दा हा। बैठक दौरान विधानसभा दे बजट इजलास च पुट्टले आहले मसलें पर तफसीली चर्चा कीती गई।

<><><><><><>

HM Drug Traffickers

गृह मंत्री अमित शाह होरें आखेआ ऐ जे पूरे देशै थमां 12 बक्ख-बक्ख मामलें च नशीले पदार्थ दे 29 तस्करें गी अदालतें दोषी करार दित्ता ऐ। सोशल मीडिया पर इक पोस्ट च श्री शाह होरें आखेआ जे नरेन्द्र मोदी हुंदी सरकार नशीले पदार्थ दे तस्करें गी सजा दोआने लेई वचनबद्ध ऐ। एह तस्कर युवाएं गी नशे दी गिरफ्त च आहिन्नयै उंदा जीवन तबाह करी दिंदे न। श्री शाह होरें आखेआ जे उंदी सरकार नशा मुक्त भारत बनाने लेई जांच-पड़ताल दे कन्नै, नशीली दवाएं दे खतरे कन्नै लड़ना जारी रखोग।

<><><><><><>

Bike Rally Reasi

नशे दी माइभक्कवैतू थमां निब्बड़ने लेई मकामी नौजवानें कन्नै रलियै रियासी जिले च इक बाइक रैली कइडी गई। इस पैहलकदमी दा मकसद लोकें च ते खास करियै नौजवानें च नशे दी माड़ी लत दे असर बारै जागरूकता पैदा करने दे असर बारै जागरूकता पैदा करने दे अलावा समाज गी नशामुक्त बनाने लेई लोकें दी शमूलियत दी महत्ता गी उजागर करना हा। इस रैली च कई सारे मकामी नौजवानें ते समाजी कार्यकर्ताएं बदी चढ़ियै हिस्सा लैता। उनें हत्थें च बैनरें ते प्लेकार्ड लेइयै नशे दे माड़े असर बारै लोकें गी जानकार बनाया। एह रैली भीमगढ़ किले थमां शुरू होई ते शैहरा दे मुख-मुख इलाकें थमां लंघदे होई चिनाब पुल पर जाइयै सम्पन्न होई। इस मौके पर बोलदे होई डीएसपी रियासी विशाल सिंह जम्वाल होरें आखेआ।

<><><><><><>

Protest Drug Abuse

तोआई, जम्मू जिले च बी नशे दी माड़ी कबैतू खलाफ लोकें च जागरूकता पैदा करने लेई जम्मू प्रोविन्स बचाओ मंच आसेआ प्रदर्शन कीता गेआ। प्रदर्शनकारियें खिते च बदरदी इस माड़ी कबैतू खलाफ लोकें गी किट्ठे आइयै इकजुट होने दा आह्वान कीता। इस दौरान कई सारे मकामी लोकें ते समाजी कार्यकर्ताएं दी शमूलियत दिक्खी गई। जम्मू प्रोविन्स बचाओ मंच दे चेयरमैन ते साबका एम.एल.सर वकील अशोक शर्मा होरें किट्ठ गी संबाधित कीता। इस मौके पर बोलदे होई उनें आखेआ।

<><><><><><>

India Poverty

इक नमें शोध दे मताबक पिच्छले दहाके च देशै च गरीबी च महत्वपूर्ण कमी आई ऐ। प्रमुख अर्थशास्त्री सुरजीत एस. भल्ला ते करण भसीन आसेआ प्रकाशित लेख च बारे 2022-23 ते बारे 2023-24 दे हाल च गै जारी घरेलू खर्च दे आंकड़ें दा विश्लेषण कीता गेआ। सर्वेक्षण दे आंकड़ें थमां पता लगदा ऐ जे देसै च गरीबी दे स्तर च कमी आई ऐ। शोध च दावा बन्नेआ गेआ ऐ जे देशै च बड़ी मती गरीबी हून लगभग खत्म होई चुकी दी ऐ। शोध दे मताबक इस गल्लै दे पक्के सबूत न जे बारे 2011-12 थमां वर्ष 2023-24 तक दी अवधि दे दरान देशै च गैर-बरोरी च बी तेजी कन्नै कमी दिक्खी गई ऐ।

<><><><><><>

CAPEX Budget Tourism

सैलसफा मैहकमे दियां कमिशनर सैक्रेटरी यशा मुदगल होरें सैलसफा मैहकमे दे कैपेक्स बजट 2024-25 दी समीक्षा लेई इक उच्ची सतह दी समीक्षा कीती। सिविल सचिवालय च लग्गी दी इस बैठक च सैलसफा मैहकमे दे कम्मकाज दा बी जायजा लैता गेआ। बैठक दौरान इस्सलै जारी सैलसफा परियोजनाएं दी अमलावरी, बुनियादी ढांचे च सुधार ते खिते च सैलसफा गी बढ़ावा देने लेई होरनें पैहलुएं बारै चर्चा कीती गई। कमिशनर सैक्रेटरी होरें जारी परियोजनाएं गी समेंसिर पूरा करने दे अलावा आवंटित फंडें दा सेई इस्तेमाल दी लोड़ पर जोर दिता। प्रशासनिक प्रक्रियाएं गी सुचारू बनाने दी जरूरतें गी उजागर करदे होई उनें सैलानियें दा अनुभव बदाने लेई गुणवत्ता आहली सेवां यकीनी बनाने पर बी बल दिता।

<><><><><><>

CCTNS-Review

उधमपुर-रियासी रेंज दे डीआईजी रईज़ मोहम्मद भट्ट होरें एसएसपी उधमपुर अमोद अशोक नागपुरे हुंदे कन्नै रलियै रेहम्बल पुलस थाणे दा दौरा कीता ते उत्थें निगरानी ते जांच सरबन्धी अधिकारियें कन्नै बैठक कीती। इस मौके पर उनेंगी अपराध ते अपराधियें गी ट्रैक करने सरबन्धी नेटवर्क ते सिस्टम CCTNS दे कम्मकाज बारै जानकारी दिती गई। इस मौके पर जांच सरबन्धी अधिकारियें गी आखेआ गेआ जे इस सिस्टम दा बवस्थित ढंग्गै नै इस्तेमाल यकीनी बनान। तोआई, एसएसपी जम्मू जोगिंद्र सिंह होरें बख्शी नगर आहले पुलस थाणे च बी CCTNS सिस्टम दे कम्मै-काजै दी समीक्षा कीती। उनें मुतलका अफसरें गी हिदायत बी दिती जे ओह सिस्टम च आपूं डेटा पान तां जे सटीकता ते दक्षता यकीनी बनाई जाई सकै।

<><><><><><>

Computer Skill Prog.

जम्मू-कश्मीर न्यायिक अकैडमी, जानीपुर जम्मू च आयोजित कम्प्यूटर कौशल विकास, साईबर अपराधें, डिजिटल सबूतें ते ई-अदालतें पर आधारित द'ऊं दिनें दा कार्यक्रम अज्ज संपन्न होई गेआ। एहदा आयोजन जम्मू संभाग दे सिविल जजें लेई कीता गेदा हा। इस कार्यक्रम दे दुए ध्याड़े दिल्ली थमां एडवोकेट निशीथ दीक्षित होरें दौनें सत्रें दा संचालन कीता ते इस दरान उ' नें आईटी कानून ते भारती न्यास संहिता 2023 तैहत साईबर अपराधें ते होरनें सरबन्धत साईबर कानूनें बारै महत्वपूर्ण जानकारीयां सांझी कीतीआं। उ' नें गलाया जे जि'आं-जि'आं तकनीकां उन्नत हुंदिआं जा करदिआं न, उ'आं-उ'आं साईबर अपराध बी बधदे जा करदे न।

<><><><><><>

Clean Samba

साम्बा दे जिला विकास कमिशनर राजेश शर्मा होरें पंचैत भडेरी च शुरूआती तौरा पर स्वच्छ साम्बा पैहलकदमी दी शुरूआत कीती ऐ जेदे कन्नै कचरा प्रबंधन दे कन्नोकन्नी “waste from

wealth” आहला रौंस यानि बेकार पेदी चीजें गी इस्तेमाल होने आहली चीजें च तब्दील करियें माली मदाद दे मौके उपलब्ध करोआने गी बढ़ावा देना ऐ। इस पैहलकदमी दे हिस्से दे तौरा पर मकामी लोकें च कूड़ादान बंडे गे तां जे उनेंगी कचरा प्रबंधन दी महत्ता बारे जानकारी बनाया जाई सकै ते कचरे दे परती-परतियें इस्तेमाल लेई उनेंगी जागरूक कीता जाई सकै। इस मौके पर बोलदे होई डी.सी हों ऐ इस पैहलकदमी गी ग्रीन इनीशिएटिव आखेआ। उनें गलाया जे कचरे गी किट्ठा करने लेई बैटरी कन्ने चलने आहले ऑटो दा इस्तेमाल कीता जाग ते जैविक कचरे गी खाद च बदली दिता जाग। एहदे कन्ने खिते च साफ- सफाई यकीनी बनोग।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोइचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोइचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी पिन कोड 180001 उप्पर उप्पर 07 मार्च 2025 थवां पैहले-पैहले आइए दस्ती जमा करोआनी होग। इस बारे व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>